

Sarajevo, 11.01.2022. godine

**Poštovani predstavnici medija,**

Zadovoljstvo mi je da vas u ime zaposlenika Porezne uprave i u svoje lično ime pozdravim i da vam se zahvalim što ste u proteklom periodu pratili i izvještavali o radu Porezne uprave, što ste pisali i govorili o temama iz nadležnosti Porezne uprave, što ste prenosili naša saopćenja upućena poreznim obveznicima i javnosti i tako doprinosili razvijanju ukupne percepcije o značaju, potrebi i obavezi plaćanja poreznih obaveza. Imajući u vidu vašu ulogu s pravom mogu reći da u rezultatima koji su postignuti u proteklom periodu ima i vaše zasluge. Kapacitet poreznog sistema svake uređene, razvijene i stabilne države određuje njen državni kapacitet, zato vam hvala što ste doprinosili širenju državnog kapaciteta.

Odlučio sam da zbog pandemije ove godine ne održavamo godišnju pres konferenciju na kojoj bi vam prezentirali rezultate rada, kao što smo to radili proteklih godina, tako da ću informacije prezentirati direktno putem video linka Federalne novinske agencije FENA-a koji će biti dostupan svim medijima, a prezentaciju s podacima i informacijama o najznačajnijim aktivnostima koje je ostvarila Porezna uprava Federacije Bosne i Hercegovine vam dostavljam elektronski, te vam stojim na raspolaganju za sva eventualna pitanja.

Vizija Porezne uprave Federacije Bosne i Hercegovine je da ona postane pravedna, racionalna, efikasna, transparentna i poštovana institucija, koja će dati doprinos razvoju uređene i stabilne države, koja će biti efikasna u ubiranju javnih prihoda, kvalitetan servis poreznim obveznicima i građanima i u kojoj će zaposlenici Porezne uprave raditi u normalnim uslovima rada i za svoj rad primati adekvatnu plaću. Porezna uprava svojim radom nastoji dati svoj doprinos izgradnji boljeg i pravednijeg društva i nadam se da ćemo na tom putu, kroz objektivno i blagovremeno izvještavanje, kao i do sada imati vašu podršku.

Jedan od primarnih ciljeva Porezne uprave Federacije Bosne i Hercegovine je razvijanje percepcije i svijesti poreznih obveznika da bez prisile Porezne uprave blagovremeno, dobrovoljno prijavljuju i plaćaju svoje porezne obaveze, jer tako iskazuju i ljubav i poštovanje prema domovini. Analizirajući trendove naplate javnih prihoda u posljednjih nekoliko godina sa sigurnošću mogu zaključiti da se ovaj naš primarni cilj realizuje i ostvaruje, jer su porezni obveznici u toku 2021. godine koja je bila teška za poslovanje do sada uplatili rekordan iznos javnih prihoda za koje je nadležna Porezna uprava. Naime, porezni sistem je jedan od najvažnijih poluga i instrumenata razvoja ekonomske politike svake uređene i stabilne države i s pravom se može reći da kapacitet poreznog sistema određuje kapacitet države. Uplatama poreza porezni obveznici su širili, povećavali i jačali državni kapacitet i tako doprinosili osiguranju uslova za bolji život svih građana. Zbog toga čestitam i iskreno i toplo se zahvaljujem svim poreznim obveznicima što su u ovako složenim društveno-ekonomskim, političkim i zdravstvenim prilikama uplatili rekordnih 5,6 milijardi javnih prihoda iz nadležnosti Porezne uprave FBiH i svojim uplatama jačali i širili kapacitet države. Posebno se zahvaljujem poreznim obveznicima koji su se odazivali pozivima i porukama Porezne uprave i dobrovoljno bez prisile i sankcija Porezne uprave prijavljivali i plaćali svoje porezne obaveze.

Posebno se želim zahvaliti zaposlenicima Porezne uprave Federacije Bosne i Hercegovine koji su u protekloj 2021. godini dali veliki doprinos ostvarenju rezultata rada i ostvarivanju naše vizije.

U prilogu vam dostavljam prezentaciju s najznačajnijim aktivnostima i rezultatima rada Porezne uprave koji rezultati govore o ostvarenju naše vizije i koji omogućavaju uslove za kvalitetniji život građana BiH, a video prenos možete pratiti uživo, ili preuzeti putem linka Federalne novinske agencije FENA-a koji će biti dostupan svim medijima.

**S poštovanjem,**

**Direktor  
Mr. sci. Šerif Isović**